

# TITOS

## TITOS 1

Alamat sorat ako i Paolo a oripen o Allah ago siyogo i Isa Al Masih kaan aken mapakabager so paratiyaya o siran oto a pinili o Allah ago so katao iran ko tito a benar a pepekaagak kirin ko soti a kapaginietaw.

**2** Giyangkai a paratiyaya ago katao na i pepasod ko arap ko kaoyagoyag a da a kaposan iyan. So Allah a di makapemokeg na initopa niyan angkai a kaoyagoyag sii ko da pen kaadena ko doniya.

**3** Na sii ko osto a masa na piyayag iyan so katero iyan a nggolalan ko kiyapakalangkapa ko ron, ka inisana raken angkai a galebek a nggolalan ko sogoan o Allah a Pepanabet rektano.

**4** Makasampay angkai a sorat ki Titos a wata aken ko paratiyaya a di tano dii mambagian.

Pengnin ko a malalayon reka so limo ago kalilintad a poon ko Allah a Ama ago si Isa Al Masih a Pepanabet rektano.

### *So Galebek i Titos roo sa Krita*

**5** Aya sabap a kinibegaken aken reka sa Krita na an ka mapakatanor so manga nganin a da pen mapasad ago an ka makapanoro sa manga pelokelokesen ko Agama sii ko oman i inged. Tatanodi ngka so manga insarat aken reka a

**6** Paliyogat ko pelokelokesen a di kedawayan, isaisa bo i karoma, ago petoman so manga wata iyan a kena a ba aya kapekenega on na di siran mipapaar o di na di makaaadata.

**7** Kagiya inisana ko nakoda so galebek ko Allah na paliyogat on a da a ba on kidaway, kena a ba takabor, kena a ba magaan kararangitan, kena a ba tamereg, kena a ba marangit, ago kena a ba mala i napso,

**8** Ka disomala a masakaw sekaniyan, a pekebabayaan iyan so mapiya, ago maongangen, matito, baraatmal, ago mipapaar iyan a ginawa niyan.

**9** Paliyogat on a kekepitinan iyan piyapiya so kasasarigan a katero a inipangendaon ron kaan iyan kapangosiyati so ped ko ontol a ndao ago an iyan mapakapangimbenar so siran oto a pesopak on.

**10** Ka madakel a taw a pepamanopak a ba di labaw so ped ko miyamakateklid a poon ko agama a Yahodi a ndadagen iran so ped ko kalalalongan a katero iran.

**11** Disomala a pakareneken siran, ka pepekabinasa siran ko langon o manga pamiliya a nggolalan ko kipepangendaon iran ko di patot a manga ndao kaan iran mipangowarta ngkai a piyakayaya a okit.

**12** So den so sakataw a taw sa Krita a isa ko manga goro iran i mitero on a “So manga taw sa Krita na manga bokeg, manga rarangit a manga binatang, ago tapolan a manga bosaw.”

**13** Na benar angkoto a pitero iyan. Kagiya ka maoto na mbongeti ngka siran sebenar kaan makaontol so paratiyaya iran

**14** Ago an iran di ketago sa ginawa iran so di benar a manga totol o manga Yahodi ago so

manga sogoan o taw a tomiyalikod ko tito a benar.

**15** So langon taman na soti ko siran oto a manga sosoti, ogaid na da den a nganin a ba soti ko siran oto a maresik ago di pemaratiyaya, ka miyakaresik baden so pamikiran iran ago hatin.

**16** Tetaroon iran a katawan iran so Allah, ogaid na ipepalaw iran ai a nggolalan ko manga olaola iran. Ikagogowad siran, manga taongkir, ago di siran makapenggolaola sa apiya antonaa a mapiya a galebek.

## **TITOS 2**

### *So Ontol a manga Ndao*

Ogaid na seka na pamandoon ka so manga olaola a ipapaliyogat o ontol a ndao.

**2** Tomai ngka so manga totoa a mama a patot a panginginsokor siran, makaaadata, pekipaaren iran a ginawa iran, ago piyapiyai iran so paratiyaya iran, so kapekebabayai iran ko ped, ago so kapakatiger iran.

**3** Tomai ngka pen so manga totoa a babay sa kanggolaolaa iran ko patot ko dii mananangoran ko Allah. Paliyogat a di siran pemaganta, di siran pekioripen ko kapeginom sa arak, ago pepangendaon iran so mapiya a olaola.

**4** Sii sangkai a okit na malayam iran so manga ngongoda a babay sa kapekebabayai iran ko manga karoma iran ago manga wata,

**5** So kagenggena ko manga ginawa iran, so kapaginetaw a soti, so mapiya a kapekibira iran ko walay iran ago so kapakimbabaya iran ko manga karoma iran kaan da a ba makapegitowito ko katero o Allah sabap ko olaola iran.

**6** Datar oto mambo na osiyati ngka so manga ngongoda a mama sa kagenggena iran ko manga ginawa iran.

**7** Seka peman na sii ko langon a di ngka dii nggolaolaan na baloya ngka a ginawa ngka a ladiyawan ko manga pipiya a galebek. Sii ko kapepangendao ngka na pakiilain ka a maliwanag ka i poso ago makaaadata.

**8** Osara ngka so manga pipiya a katero a di kedawayan kaan kayai so manga makasosorang reka a da a ba iran mapetero a marata makapantag rektano.

**9** Tomai ngka so manga oripen sa kapakimbabaya iran ko manga kadnan iran. Paliyogat a kapesoata iran kirian sii ko langon a pesowaan iran ago di iran penembagen

**10** Aya pen o ba iran pemanekewi, ka pakiilain iran baden a lalayon siran kasasanaan piyapiya. Amay ka magiyoto na sii ko langon a di ran dii nggolaolaan na keilay a mapiya so ndao makapantag ko Allah a Pepanabet rektano.

**11** Ka so limo o Allah a pegowiten iyan so kakesabet na miyapayag den ko langon a taw.

**12** Giyangkoto a limo na aya rektano pepamarinta sa katalikodi tano ko manga olaola a pekasarani ago so manga rarata a kabaya a kadodoniyai kaan tano makapaginetaw a mangingsokor, maontol, ago pepagamal sa masa imanto

**13** Sii ko kapenayawa tano ko aarapen tano a ikebabaya tano a giyoto so kakepayag o lebi a mala i gees a Tohan tano ago Pepanabet rektano a si Isa Al Masih sii ko bantogan iyan.

**14** Inirila iyan a kaoyagoyag iyan para rektano kaan tano niyan mapokas ko langon a kamarataan ago an tano niyan mabaloy a soti a manga pagtaw niyan a lalayon kateterangan nggolaola sa manga pipiya a galebek.

**15** Pangendaon ka angkai a manga pandoan na pangosiyati ngka ago pakaontola ngka so pepamakineg reka a rakes o langon a kapaar. Di ngka peparowa o ba ka masodi o apiya antawaa.

### **TITOS 3**

#### *So Kanggolaola ko manga Pipiya a Galebek*

Pepakitanodi ngka ko manga taw a pakimbabaya siran ko gobirno ago so manga olowan ago petomanen iran siran a makatitiyagar siran nggolaola ko langon a mapiya a galebek.

**2** Tomai ngka siran sa di iran pegitowitoa so apiya antawaa, ka ba siran den dii pelilintada ago dii nggiginawai a lalayon iran pepakiilay so parangay a baraadaten ko langon a taw.

**3** Ka gowani na sektano mambo na pekelalolalong, pepamangongkir ago pepanga dadadag. Miyapangongoripen tano o mbarambarang den a manga rarata a kabaya ago ikasosoat o ginawa tano. Aya inipaginetaw tano na so kamarataan ago kariit. Inikagowad tano o manga ped na inikagowad tano siran mambo.

**4** Ogaid na sii ko kiyapayag o limo ago gagaw o Allah a Pepanabet rektano

**5** Na siyabet tano niyan a kena a ba sabap ko apiya antonaa a maontol a galebek a miyanggolaola tano, ka sabap ko kapedi iyan. Sii ko kiyasabeta niyan rektano na liyompiyowan tano niyan ago bigan tano niyan sa bago a kaoyagoyag a nggolalan ko kiyambagowi rektano o Soti a Roh.

**6** Giyangkai a Roh na minitaralo a kiyaododa on rektano o Allah a nggolalan ki Isa Al Masih a Pepanabet rektano.

**6** Na kagiya inibilang tano o Allah a manga oontol sabap ko limo iyan na katawan tano imanto a mapekewali tano so kaoyagoyag a da a kaposan iyan.

**8** Na benar angkai a manga katero.

Kabaya aken a lalayon ka pepamataanan angkai a manga ndao kaan so miyamaratiyaya ko Allah na matordo iran so di ran dii kanggolaola sa manga pipiya a galebek. Langon taman ai na mapiya ago mala i gona ko manga taw.

**9** Ogaid na lidasi ngka so kalalongan a kapakindadaowai, so dii kakedekedega ko manga apoapoan, ago so di kapegayonayon ago kapakipepwala makapantag ko Kitab, ka langon ai na pekabinasa ago da a lalaw niyan.

**10** So taw a aya pekesabapan ko dii kapakasisibaya o magaagama na lalangi ngka sa makaisa o di na makadowa, na oriyan ai na talikodi ngka sekaniyan.

**11** Ka katawan ka a so datar oto a taw na bibid i pamikiran, na so manga dosa niyan na aya poriba a miyaribat sekaniyan.

#### *Kaposan a manga Insarat*

**12** Amay ka pakasongen aken san reka si Artimas o di na si Tikiko na nggagaani ngka a kapakasong ka raken sa Nikopolis, ka miyapamikir aken a tereg ako roo sii ko masa a panenggaw.

**13** Panamari ngka a kapegimowi ngka ki Sinas a so abogado ago si Apolo para sa kapakalalakaw iran kaan da a korang kirin.

**14** Patot ko ped ta a pepamaratiyaya a masowa iran so di ran dii kanggolaola sa manga

pipiya a galebek kaan iran makowa so manga nganin a kailangan iran ago an mala a ipagonga o kapepaginetaw iran.

**15** Pesalamen ka o langon a ped aken sii.  
Sampain ka so salam aken ko manga ginawai tano san ko paratiyaya.

Pengnin ko a matatap rekano langon so limo o Allah.